

Dörfleischter 2009 – 4.1.09 Willkommensfest Sämu Schmid



Grüessech grüessech mitenand, d' Dörfleischter sy im Land,
Mir lade Euch jetz aui y, mit üs es Bitzli luschtig z' sy,
Denn mir trage mit Humor, es paar Sache übere Sämü vor,
Es isch nüt truurigs u ou nüt schuurigs, aber troztdäm aues wohr

Es fröit üs wie 'ne Moore vom chline Zähje bis zu de-n-Ohre,
Für e Sämü dörfe z' singe u Geischtergrüess us Biel z' überbringe,
Mir finge's eifach pfundig, hie dörfe z' sy dä Sunntig,
Jetzt bruchsch "non de Dieu" - d' Bundeshütte nümme z' gseh,
Mir tüe Dir gratuliere, wie Du das hesch möge präschtiere,
U säge mit lutem Gschrei - "Welcome back Sämü, dehei !"

Mir sy holladrio - aus Bäre do häre cho,
Ds Wappetier vo Bärn - das heigsch Du bsungers gärn,
Mir Bärner hei gärn Züpfe das git e breite Rügge,
Mir Bärner hei herti Gringe u bi üs isch öppis dinne,
Bi der Zürcher SVP, bezwiefle mir das e chle(i),
Das merksch wenn die parliere, dass die nid viel tüe studiere !

Mir Geischter hei vernoh, dass Di im Chindesauter scho
Politik hett interessiert u d' Wäng mit Bundesrät hesch tapeziert,
Du hesch schiens in der Tat, wöue wärde Bundesrat,
U dass du das hesch gschaftt - hett vieli überrascht,
Jetzt bisch Alt-Bundesrat u chasch sicher sehr guet penne,
Im Gägesatz zu döune Memme - wo sich "abgwäute Bundesrat" nenne !

Chasch di fröie jedi Stund, wo jetze uf Di chunnt,
Chasch ir früeche Morgestund, go spaziere mit em nöie Hund,
Villicht begänisch em Herr Stettler, dä hett e brune Setter,
Oder dr Frou Styner, die hett e Bärnhardiner,
U wenn di Hund bim seiche, Mure(r) oder Brunne(r) tuet breiche,
De gisch ihm nach em Bade, e grosse Zürcher Chnoche z' gnage

Aus Bundesrat bisch du ou gäng bescheide blibe,
Wär öppis anders bhauptet het masslos übertribe,
Am Schwingfescht hesch zwar nid gwschunge u wie me di uf Platz het brunge,
Nid öppe im Luxus-Chare, sondern mit em Ghüderwage,
Me gseht di ou z' Magglinge, e churzi Strecki springe,
Mit Betonig uf churz, denn bim Start gits e filmryfe Sturz !

Bodeständig, ächt, u mit grossem Charisma,
So bisch Du Bundesrat gsi, für üs e richtige Staatsmaa,
Dis Amt hesch Dim Nachfolger übergäh, em "Ueli dr Chnächt",
Was hesch so ds Gfühel, was meinsch ? tschegget dä das ächt ?
Aus hundertöufte Bundesrat, das möchte mir erwähne,
Het me würlklich nume so ne Chaschperli chönne wähle !

Ig bi der Sämü Schmid u bi - im ganze Land bekannt,
Bi doch e guete Bundesrat gsi, das hei nid alli erkannt,
Si hei Muure bouet u Brunne vergiftet im Bundeshuus in Bärn,
Drum chumi jetze zrüg uf Rütli - mis Dorf i ha di gärn,

Jetzt si mer am Ändi vo üsere Bank
U säge Dir Sämü ganz härzleche Dank
Für das, was Du für üsi Schwyz alles hesch gmacht,
Mir Bäre si stolz uf Di, hesch es guet gmacht !
Tri-a o Narretie, tri-a jetz isch's verby
Tri-a o Narretie, tri-a so söu es sy !